

**SEMPENA MAJLIS MENGADAP DAN ISTIADAT PENGURNIAAN DARJAH  
KEBESARAN DAN BINTANG-BINTANG SERTA PINGAT-PINGAT**  
ISTANA NEGARA, KUALA LUMPUR, 11 JUN 1987

Mengadap Duli Yang Maha Mulia Seri Paduka Baginda Almutawakkil Alallah Sultan Iskandar D.K., Yang Di-Pertuan Agong Malaysia Ampun Tuanku.

Bagi pihak Kerajaan dan seluruh rakyat serta diri patek sendiri, patek mohon menyembah setinggi-tinggi ucapan tahniah kepada Duli Yang Maha Mulia Tuanku, sempena Majlis Mengadap dan Istiadat Pengurniaan Darjah Kebesaran dan Bintang-Bintang serta Pingat-Pingat pada hari ini.

2. Sempena hari yang berbahagia ini, patek sekalian berdo'a ke hadrat Allah Subhanahu Wataala semoga dilanjutkan usia serta dilimpahkan rahmat dan hidayahNya kepada Duli Tuanku serta Duli Yang Maha Mulia Seri Paduka Baginda Raja Permaisuri Agong. Demikian juga, patek sekalian berdo'a semoga Tuanku berdua sentiasa di dalam kandungan sihat walafiat, serta memerintah dan memegang teraju tertinggi pemerintahan negara Malaysia, dengan bertambah daulat dan kemuliaan.

Ampun Tuanku,

3. Ekonomi negara yang menunjukkan tanda-tanda pemulihan akhir tahun lalu terus berkembang tahun ini. Permintaan ke atas barangan eksport negara telah bertambah dan harga beberapa barangan komoditi telah meningkat ke paras yang menggalakkan. Harga minyak petroleum semakin stabil, harga minyak sawit telah meningkat, dan begitu juga dengan harga bijih timah. Patek yakin proses pemulihan ekonomi negara ini akan berterusan walaupun secara perlahan-lahan, insya-Allah.

4. Di samping itu, kawalan ke atas import dan kawalan kewangan yang ketat oleh Kerajaan semenjak beberapa tahun yang lalu telah menampakkan hasil yang menggalakkan. Salah satu contoh kejayaan kawalan itu ialah berkurangnya jumlah import, sementara defisit akaun tak ketara atau 'invisibles account' bertambah baik. Kejayaan langkah-langkah ini dibayangkan juga melalui meningkatnya rizab antarabangsa atau 'external reserves' negara kita.

5. Pada keseluruhannya Kerajaan yakin ekonomi negara akan terus berkembang tahun ini. Kerajaan memerlukan inisiatif yang lebih lagi daripada sektor swasta bagi meningkatkan pelaburan dan pengeluaran barangan eksport. Dengan wujudnya beberapa insentif oleh Kerajaan bagi para pelabur dan pengilang sejak dua tahun lalu, penyertaan swasta semakin menggalakkan. Walau bagaimanapun penyertaan swasta boleh ditingkatkan lagi pada tahun-tahun yang akan datang.

6. Mengenai perpaduan pula, Alhamdulillah, kita bersyukur dengan tahap perpaduan yang telah kita capai setakat ini. Namun demikian Kerajaan akan terus berusaha untuk meningkatkan lagi perpaduan rakyat supaya terbina satu negara yang teguh lagi makmur. Insya-Allah, cita-cita Kerajaan akan

dimakbulkan oleh Allah Subhanahu Wataala.

Ampun Tuanku,

7. Patek, bersama-sama dengan Menteri-Menteri, Timbalan-Timbalan Menteri, dan sekalian kakitangan Kerajaan, akan terus menumpukan usaha dan tenaga untuk menyempurnakan tugas dan tanggungjawab patek sekalian dengan penuh semangat dan tekad bagi menjamin kemakmuran, keselamatan dan kebahagiaan rakyat dan negara Malaysia.

8. Pada hari yang berbahagia dan penuh istiadat ini, bagi pihak diri patek, Kerajaan dan seluruh rakyat, patek dengan segala hormat dan takzimnya mohon menyembah ikrar taat-setia yang tidak berbelah bahagi kepada Duli Tuanku.

Ampun Tuanku, sembah patek harap diampun.